

Sajak

Percintaan

i.

Tuhanku,

dalam hidup yang kehancuran ini
akan ku bina segala keazaman
yang kudus dan lurus
dengan segala kebesaran dan keadilan.

Benarlah, tiada siapa yang mengetahui
tentang kehancuran dalam diri
melainkan, hanya pada Mu jua
hidup ini ku serahkan
dengan segala kewujudannya.

ii..

Ah, betapalah benarnya hidup ini
bercitera bersertanya drama
dengan melodi hingga ke hujung langit.

Dan atas setiap kehancuranlah
ku bangun terus hidup ini
dengan segala kebenaran dan keadilan
kerana, pada-Mu jualah
akan datang dan perginya!

Tuhanku,

benarlah, tentang kebenarannya
hidup bersertanya jalinan
yang kudus dan lurus
dengan segala kewujudannya.

iii

Telah kau ketahui oh, Tuhan
tentang kehancuran hidup ini
dan percayalah, ia ku bina semula
dengan segala keazaman yang kukuh dan teguh.

Benarlah, atas segala kehancuran
ku bangun terus hidup ini
dengan kenyataannya.

iv.

Ya bangunlah bersertanya keazaman
bahawa: hidup ini pasti dengan percintaan!

-Tinta Hijau
Bandar Brunei.

Engkau Jua

Kasihku!

Betapa tiada gentar hatiku
wajahmu nan mempersona jiwa
membela rasa rindu semata.

Di malam awan cerah
bermain denyutan jantung yang tiada tara
dibaliknya cadar memalut cumbuan mesra
tersenyum lembayan kasih
harap gamitan penuh nikmat.

Kasihku!

Di mana engkau
nyala dihati bibir ingin mengucup
menyerah kasih yang tiada sampai
bersimpuh dengan gemawan kalbu
"Tuhan hanya satu".

Engkaulah juwita
sampiran hening di malam kudus
jari-jemari membelai keesaan-Mu
tiap detik nafas menyesak
engkau jua dalam hatiku.

- Jauhari Kelana
Medan Indonesia